

Gvangjsih Minzczuz Bau

ganhhau: CN45-0036 B.2020 Nd.4 Ng.22 liggaueq gengcej nienz ndwenseiq samcib

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3420 期

Denyingj Dinj Vahcuengh 《Minzczuz Doxgiet Ranz Vunz Ndeu》 Cingqsik Boqcuengq

Mboengqneix, denyingj dinj Vahcuengh 《Minzczuz Doxgiet Ranz Vunz Ndeu》 Hozciz Si Minzczunghvejij cujiz goepingj haenx cingqsik boqcuengq, vih senhconz minzczuz doxgiet cinbu gyalai rengz moq.

Denyingj doenggvaq Lanz Swng bouxcoz Yauzczuz Bahmaj Yauzczuz Swciyen ndaej daengz daxboh son camgya gij hozdung minzsuz vwnzva “sam nyied sam Bouxcuengh”, lwnhgangj gij gojgaeq hawj vunz gamjdoengh ndaw Cuengh Yauz daengj lwgminz gak cuz: It dwg youq aen nienzdaih hoenx ciengq, Veiz Bazginz bouxcoz Bouxcuengh bae daengz Bahmaj Sihsanh Yangh guh gwzming senhconz hozdung, vunzlai Yauzczuz Sihsanh Yangh camgya

gwzming nyauznyaueq, caeuq gyoengq bing Veiz Bazginz daiq haenx itheij hoenx ciengq, itcig daengz hoenx ciengq ndaejhingz; ngeih dwg youq mwh gaijgwz hailangh, lajmbanj saedhengz aen cwzyinci gyaranz bauguh, Cuengh Yauz daengj vunzlai gak minzczuz doxbang doxcoengh, lumjbaenz vunzlai Yauzczuz bang vunzlai Bouxcuengh coih mieng, vunzlai Yauzczuz mbouj miz haeuxgwn, vunzlai Bouxcuengh gien haeuxgwn; sam dwg youq aen seizdaih moq sevei cujyi, Cuengh Gun daengj lwgminz gak cuz gaenxmaenx han'wngq gij yuqnaeuz aen dangj, bae daengz Mbanjyauz guh hong cinjcing banggungz, daiq vunzlai Yauzczuz vut gungz baenz miz, saedyienh aen loqsiengj siujgangh. Doenggvaq geij

aen gojgaeq iq, yienh'ok gij leixniemh minzczuz doxgiet lwgminz gak cuz doxliz mbouj ndaej, aeu caemh diemheiq, caemh diuz mingh, sim doxlienx, caezcaemh doxgiet haenqguh, caezcaemh hoenghvuengh hwnghfat.

Geij bi neix daeuj, Hozciz Si mboujduenh cingjhab swhyenz, laebdaeb goepingj ok le 《Deqcaj》《Mbouj Caiq Deqcaj》《Gou Caeuq Aen Guekcoj Gou》 daengj lai bouh denyingj dinj Vahcuengh caeuq MV ciengqgo. Doenggvaq yungh vah minzczuz vunznoix gangj gojgaeq aenbiengz, langhbaij yienhsiengq aenbiengz, hawj vunzlai minzczuz laujgih caezyiengj daengz gij cwngzgoj aenbiengz hwnghfat hoenghwd.

(Veiz Dunchwngz)

SIUSIK DINJ

● Geij bi neix daeuj, Duh'anh Yauzczuz Swciyen ciuq dieg bae guh, daiq vunzlai gungzhoj gohyoz ciengx rwi, haenqrengz hwnghfat ciengx rwi canjnieb, damqra byaij ok diuz roen vut gungz baenz miz ndeu. Seizneix, aen yienh neix miz 3 aen hozcozse ciengx rwi, 23 aen ciengz ciengx rwi, moix aen ciengz ciengx rwi bi gai dangzrwi ndaej 6 fanh maenz baedauq.

(Hanz Ginhcinz)

● Bineix doxdaeuj, Lozcwngz Mulauzczuz Swciyen gyoengq vunz ndaem mak mbouj hawj binghra qingyiangj, guh ndei guenjieix gomak seizcin, seizneix, aen yienh neix gaenq guhsat hong guenjieix 15.5 fanh moux gomak seizcin, vih mak ndaej laisou dwk roengz giekdaj ndei.

(Veiz Yuzdai)

● Bineix doxdaeuj, Denhngoz Yen aeu cauhae aen cehgenh couhnieb banggungz dangguh diuzroen youqgaenj laebdaeb daezswng vut gungz cwngzgoj caeuq coihawj vunzlai gungzhoj onjdingh gyalai souhaeuj, gujli aen giyez diegguenj hab diuzgienh haenx laeb aen cehgenh banggungz, sou vunzhong dangdieg bae giyez guhhong, hawj gyoengqde ndaej gyalai souhaeuj.

(Denz Siyenj)

● Ndwen 4 ngoenz 15, Nanzdanh Yen gaenxmaenx camgya “Gvangjsih gyaendei ciet ndwenngoenz raeuj sim sam nyied sam”, fuyencangj Linz Cangzci hwnj aen bingzdaiz Dauzbauj densangh cigboq, bangdoi aen yienh neix gaeq Byayauz, caz Luzlungz, haeux Bahbingz, laeuj Danhcenz daengj doxgaij ndei miz daegsaek gai bae daengz daengx guek gak dieg.

(Luz Yauz)

Sanhgyangh: Feihyiz Lai Yiengh Yinx Hek Daeuj

Ndwen 4 ngoenz 19, aen yizsi hainduj diuz ciensienq lijyouz feihyiz vwnzva Sanhgyangh fuzdaz vwnzlij “vunz Gvangjsih youz Gvangjsih” youq Sanhgyangh Duncuz Swciyen Duncdenhgung Vwnzva Gvangjancangz guh, gyoengq bouxhek daj Nanzningz, Liujcouh, Gveilin daengj dieg daeuj haenx daejniemh go, foux, siuq, dohyeh caeuq guhcaz Duncuz daengj feihyiz vwnzva lai yiengh. Ndaw doz dwg lwgnyez hag veh gijveh Duncuz.

(Gung Bujangh)

Denhdwngj Fazyen Yawjnaek Gungganq Fazgvanh Cuengh Gun Song Vah

Geij bi neix daeuj, Denhdwngj Yen Yinzminz Fazyen ciuq gij saedsaeh bonj dieg caeuq vunzlai aeuyungh, ciuq dieg bae gungganq fazgvanh Cuengh Gun song vah, caemhcai gaenxmaenx haiguh “song vah saemjbueng” “song vah fugsach” daengj swhfaz hozdung, roengzrengz guh hong fugsach daegsaek swhfaz hab gij saedsaeh diegbya, ndaej vunzlai dangdieg haenx.

Denhdwngj Yen dwg dieg comzyouq Bouxcuengh, gyauejvunz Bouxcuengh ciemq 98%, vunz dingzlai gangj Vahcuengh. Denhdwngj Yen Fazyen laebdin gij saedsaeh Denhdwngj Yen, senjnyaemh caeuq doxgyau ganbu seiz daegdaengq senjnyaemh gangingj sugrox vahdeihfueng bonj dieg haenx, seizneix gunguh miz fazgvanh yenzneg 25 vunz,

ndawde 23 boux fazgvanh dwg vunz Denhdwngj, sugrox yungh Vahgun caeuq Vahcuengh bonj dieg caeuq bouxdangsach doxgangj, vih fazyen guh hong saemjbueng ndaej swnh roengz gie.

Ciuq gij guhhong daegdiemj yinzminz fazdingz fugsach lajmbanj, aen fazyen neix aeu yinzminz fazdingz dangguh dieggoek youqgaenj gungganq fazgvanh song vah. Geij bi neix daeuj, aen fazyen neix gangingj bouxcoz ngamq ciu haeujdaeuj haenx aeu faenboiq daengz fazdingz guhhong gonq, hawj gyoengqde haeujgyawj caeuq vunzlai guh saeh, hag yungh vah minzczuz dangdieg, sugrox fungsug, vaiqdi daezsang gij naengzlig fazgvanh bouxcoz yungh Vahcuengh banh'anq.

Aen fazyen neix lij doenggvaq

“yungh geq daiq coz” gungganq fazgvanh song vah. Doiq geij bi neix daeuj mizmbangj gangingj ngamq ciu haeujdaeuj dwg vunz dieg rog, dingzlai mbouj rox gangj Vahcuengh, aen fazyen neix aeu fazgvanh geq faenboiq daengz gak aen yezvudingz, hawj fazgvanh “song vah” ciengzgeiz youq itsienq guhhong saemjbueng, gingniemh lai haenx daiq gangingj bouxcoz banh'anq, yungh vah bae son, ndanggaeuq guhyienh, bang gangingj bouxcoz daegbied dwg fazgvanh bouxcoz rox mbangj fuengsik gaijgez cengnauh, gingniemh guhfap mboujdan hab gij sibgvenq conzdungj minzczuz dangdieg youh hab faplwd gvidingh, hawj gyoengqde vaiqdi baenz fazgvanh song vah.

(Liengz Lezningz)